

LA FERMO DÓU PICHOT BERSI

À man dèstro l'umplet Mas expandis soun basti reitangulàri e founciounau. La porto bado sus un pichot courredou que vai sus la mountado d'escalíe di cambro, d'un coustat à l'estable, e, à man dèstro intran dins la cousino. Lou fougèu nègre fai escapa la vapour dóu bouldou, mentre que la pignato de biòu à la daubo expandis, dins li membre de l'oustau uno sentour qu'embaumo à te faire tafura lou talènt. Lou four se durbis sus uno pastissarié à la pasto boumbido e saureto, marna la pauso sus la taulo e la cuerb de sucre, ma sorre la grasiho en marrelado emé lou curo-fiò enrougi, acò fai mounta li sentour de caramèu e peu d'aranjo mescla.

La cousino es simplamen moublado d'uno taulo ourdinàri emé quatre cadiero sagnado, pièi un pichot bufet de bos encira e dins un cantoun uno tauleto ounto brousino lou vièi poste de radio religa dis oundo pèr uno anteno de ressort d'aran que fai lou tour de ta pèço.

L'eiguié, es uno pieleto avenado d'aigo de la poumpo à man, es aqui que la terraio se fai e que se lavo l'ourtoulaio e que se dessalo la meriusso dóu divèndre.. Dins aquéu recantoun i'a d'estagiero que servon de desbarras.

Lou cenadou es moubla d'uno salo à manja prouvençalo que vèn de nòsti grand peirenau, d'aquelo meno de muble à couroundo foço travaïado, em'un bufet à dous cors e de cadiero cenelado. Sus la taulo uno dourgueto de terraio cuecho e oumado de flour pintrado à la man, sèr de vas à flour abouqueta de Saladello.

Penja i paret lou bèu cadre de bos castan valourisant la tant poulido foutò dóu pont de Séuvo-Riau, ounto se vèi la bouvno e roussatino venènt di Santo pèr s'endraia sus lou camin dôu Queïlar. Demie li cavalié reconeissèn : Fernand granon, Andriéu Blaquière, Gabriéu e George Brun, moun papet e moun paire. Pièi dous tablèu de naturo-morto, e la foutò de papa aplanata dins li prat, ferre à la man encapela dóu Valergue, sus soun paramen de bouvino, l'eiceciounau BOCA.

Bèn acroucha au mur un tras que poulit mirau, uno gloço "Napouleoun" rebaio lou relarg de la pèço mai grand. Sus lou bufet un parèu de chien Bergié-Aleman, estatufia de gip daura, segnourejon fier lou cenadou. À si coustat uno bouteto de bos cercla sus soun pèd, reipe eisato apichouni d'un veissèu d'un miò, coume dins lou tèms se vesié dins li cavo vignassiero, e, à soun pendent uno gerleto d'un rouge bourdèus.

Repassan pèr la cousino, fin de mounta i cambro. Ah! té! nosto ingeniouso marna a acarnpa un poussin maca, i'a fa uno estello emé dos broundillo pèr i'é pedassa la pato e lou fai se recaufa dins lou tiradou à cèndre dóu fougèu, à coustat di caussoun d'eslop de papa, que sècon. Mant un cop papa s'en revèn dóu champ, bagna pèr l'eigagnado dóu matin.

Aro prenèn lis escalíe, sian sus l'eireto ounte sus la drecho se drouvis dos pichoto cambro pèr li drole e la grande pèr li parent. Li mur pinta de caus s'enausso souto lou plafoun à la franceso, es de dire souto li téule e pode vous dire que fai pas caud de rèsto dins aquéli cambro, e que mai d'un cop lou quèli de matin es qu'un tros de glaço.

À-dre di cambro la paiero clafido de bon fen qu'embaumo l'erbo sèco e quouro se rintro la recordo l'estiéu, i'a uno moulounado de cri-cri e de sautarello que se coungregon d'en pertout dins la fenniero e tambèn dins l'oustau.

Debas dis escalíe la porto de dèstro se trauco sus l'escudarié, es blanco de caus vivo e sent lou Gresiéu generousamen expandí pèr sòu e pèr mur, d'en pertout que fau desenfeta. Tout bèn renja long dóu mur dous gros cofre à gran, l'un de civado pèr li chivau e l'autre de blad e de barbarie pèr lou galinié. À la seguido sus di bos fissa dins li pèiro de la paret, lis aparèi à sulfata "lis esquino de miòu", emé tóuti lis arnascamen bèn greïssa, espèron lou travai de deman.

Lou rastelié de bos blanquinos tèn tout lou mur nord dóu founs, dessouto lou pachas n'en fai touto la loungour. Estacado is anèu, uno poulido arrengeirado de miolo nous viron l'esquino, li croupo musclado e lou péu lusènt fan gau de vèire. Li pèd dins un apaïage propre, lou mourre entre-mitan di barrèu d'à bèu cop de maïssou, li miolo nous pougisson un regaujous councert.

De Courbiero lou 15de febríe de 2008

Gabriéu BRUN